

Perta-l

Uza Konta-Góta ku Mon Pikinóti

Siringa grandi pa tenperu y konta-góta é feraméntas pirfeitu pa pratika abilidadis mutor finu. Tanbe es é ótímu pa prende konsentra y djobe atentamenti pa un kuza.

Atenson: Kes matirial ki sta sublinhadu bu ta atxá-s na bu kit. Kes matirial *en itáliku* bu pode tenê-s na kaza ô bu pode uza un kuza semelhanti.

Dikas di Feraméntas

Óra ki bu pertá-s, siringa grandi pa tenperu y konta-góta ta sai ar ô águ, purisu stabelese un régra ma pónta di kes feraménta la ka pode pontadu pa odju nen obidu di ningen. Difini régras pa uza kes feraménta la ku águ (sima, ka pode perta-l pa águ da n'algen). Pa tudu atividadi ku águ, bu debe superviziona bu fidju y svazia kel águ óra ki nhos tirmina.

Kuzas pa Sprimenta ku Kriansas entri 2 y 3 Anu


- **Mexe.** Amasa un metadi di folha di papel en fóрма di un bóla y po-l na txon ô riba méza. Fla bu fidju pa ponta kel siringa grandi pa tenperu pa kel bóla, dipos pa el perta bulbu. Ar ki ta sai di siringa grandi pa tenperu debe poi kel bóla mexe.
- **Entra y Sai.** Intxi un tijéla ku un poku di águ. Insentiva bu fidju pa panha águ ku kel siringa grandi pa tenperu y dipos perta-l pa déntu di tijéla. Panha *más un tijéla baziu*. Konvida bu fidju pa transfiri águ di un tijéla pa kel otu.
- **Gótas nun sírkulu.** Djuda bu fidju diza un sírkulu pikinóti ô poi un adizivu di formatu redondu nun padás di papel. Insentiva bu fidju pa uza konta-góta pa poi un ô dos góta di águ na kel sírkulu ô adizivu di formatu redondu. Adisiona más sírkulu ô adizivu di formatu redondu pa más prátika.



Kel Báziku


Djuda bu fidju prende uza kes feraménta li. Pensa na kumesa ku siringa grandi pa tenperu. Dipos, sprimenta konta-góta. Uza un tijéla di águ y mostra-l módi ki el ta:

- Mete pónta di feraménta baxu di superfisi di águ.
- Uza se mon ô dédu pa perta bulbu (obzerva bolhas!).
- Larga bulbu lévimenti—águ debe subi pa déntu di tubu.
- Labanta pónta di feraménta pa riba di águ.
- Dexa águ kai un góta di kada bês ô rápidamenti pa baza.



Más!

Kuzas pa Sprimenta ku Kriansas entri 3 y 5 Anu

- **Puder di ar.** Uza fita-kóla pa faze un linha di partida y un linha di txigada na txon. Amasa metadi di un folha di papel en fórma di bóla y po-l na linha di partida. Dizafia bu fidju pa uza siringa grandi pa tenperu pa poi kel bóla muvimenta ti linha di txigada. Tenta otu bês ku mini bóla di mar. Kal d'es ki ta muvimenta más rápidu?
- **Kel-li kóntra kel-la.** Intxi un tijéla ku águ. Panha dos kópu baziu. Pidi bu fidju pa uza kel siringa grandi pa tenperu pa panha másimu di águ pusível y po-l na un di kes kópu. Dipos, sprimenta mésmu kuza ku konta-góta. Kal feraménta ta poi más águ?
- **Águ ondulanti.** Kola un padás di papel di sera na méza (ô uza un pratu). Konvida bu fidju pa uza konta-góta pa panha un poku di águ di un tijéla pa pinga-l na kel papel di sera un góta di kada bês. El pode uza un palhinha pa sopra suavimenti na góta di águ pa odja kuzê ki ta kontise. (Poi *koranti alimentar* na kel águ pa fika inda más divirtidu!) 



Kuzas pa Fla

“Kuzê ki bu atxa ma ta kontise si nu...?”

Faze es pergunta pode insentiva splorason. Si kuzas ka funsiona di manera ki bu fidju pensaba, ka ta faze nada. Djuntu, nhos pode prende algun kuza!

“Ka ta faze nada, nu ben linpa-l.”

Nu debe spéra ma águ pode lansa y suja kau óra ki nu sta brinka ku el. Sta preparadu pa nhos linpa djuntu.

“Uau! Dja N odja ma bu sta sforsa pa uza kel siringa grandi pa tenperu la.”

Aplaudi sforsu. Mésmu ki bu fidju faze un kuza diferenti di kel ki bu staba ta spéra, kumemora se dispuzison a tenta.